

## Ni Chivinti yu Jalaqts'oqnil Pablo Ixlapanakni Dios yu Tavilanal Colosas

*Ni Pablo jalakmastak'ay ixlapanakni Dios yu tavilanal Colosas*

<sup>1</sup> Kit'in kPablo ixtamalaqachan Jesucristo kunita va por chuncha naul ni Dios. Aniy ch'antaun ikt'avil kilaqajk'an Timoteo. <sup>2</sup> Klamastak'ayau ni uxiknank'an ket'alaqaunin yu vilanant'ik laka putaulan Colosas yu ixlapanakni Dios unt'at'ik. Ox t'aylhip'inat'ik ch'antaun kun Cristo. Katamapaynin y oxamaktaun katamakan ni kimPay Diosk'an ali kiJalhachimo'onuk'an Jesucristo.

*Ni Pablo sk'in Dios por yu'uncha*

<sup>3</sup> Si iktapayninyau por uxiknan, vachu' ikxtaqniyau lhimalaqpuchuncha ni kimPayk'an Dios ali kiJalhachimo'onuk'an Jesucristo por uxiknan. <sup>4</sup> Ijqasmakvi ni ox lhak'ap'up'inat'ik ni Cristo Jesús y ox jalakp'axk'ayat'ik tachun ixlapanakni Dios. <sup>5</sup> Chuncha mak'ayat'ik va por alin yu p'akxan'iyat'ik. Yucha Dios talhilkama'anitan lakt'iyen. Va chuncha lanit'ik tejkan asmakt'ik ni ox chivinti yu laqsaval, yu lhichiviniy tas lay k'ap'ulaqt'axt'ut'ik. <sup>6</sup> Ni anchanu ox chivinti cha'al tus ta'an vilanant'ik, va tacha ajin tus ta'akchun ni lakamunukpa' y lhixajachal yu laj'ox. Vachu chun val kun uxiknank'an ni anchanu julchan tejkan asmakt'ik y laqsaval misp'at'ik ixjamapayninti Dios.

<sup>7</sup> Chuncha tamalanin Epafra yu k'achaniyau ali yu kintat'atapatsayan. Yucha ox tapatsaniy ni Cristo para kata'aqtayjun. <sup>8</sup> Yucha vachu kintapute'enin tacha ni Espiritu Santo tamakayan para k'alap'axk'at'ik.

<sup>9</sup> Xlhiyucha, tejkan p'unaj chuncha ijqasmakvi tus chavaycha, jantu aqtaun ikmakaunau isk'inka Dios por uxiknan. Iktapayniniyau para k'amisp'a'ot'ik yu Dios lhinajun. Chuncha k'amala'asit'ik yu ox jatapastak'ati yu minachal kun ni Espiritu Santo. <sup>10</sup> Chuncha ksk'inau Dios para kat'i'ukxunt'ayat'ik tacha tapaxtoqniy ixlapanakni kiJalhachimo'onuk'an, ex chuncha kalhipa'inil Dios. Ex ox kaxajchal tachun yu ox mak'ayat'ik. Va chuncha katalhaval ixmispaka Dios la metsukuntik'an. <sup>11</sup> Vachu' iksk'inau para k'alhits'uk'ut'ik tachun tap'asta yu minachal kun yu la ay ixtap'asta Dios. Ex lay k'at'ayanit'ik va tisuncha kaval y uxama'ay k'a'unt'ik. <sup>12</sup> Chuncha kun ahati kaxt'aqnit'ik lhimalaqpuchuncha ni kimPay Diosk'an. Yucha kintala'oxinitancha ketsukuntik'an para vachu kalaqa'iu yu kalaqxtaqniya' ixlapanakni ta'an jamapulkunti. <sup>13</sup> Kintamaxtutancha ta'an ixlhachimo'onun ni xa'ukxtin japuts'isni' y kintalhilha'an ta'an lhachimo'onun isTs'al yu la achaniy. <sup>14</sup> Yucha kintalhi'in ixjak'alna y chuncha malaqmixi'ol kintalaqalhink'an.

### *Vamun Cristo yu ay*

<sup>15</sup> La ixjatsukunti ni Cristo tasuy ni Dios yu jantu laqts'inkan. Yucha aqts'iyaj ixlhi'alinya y chuncha va tacha sa'oqsna junita tachun yu alin.

<sup>16</sup> Va yucha makal tachun yu alin lakt'iyān ali yu alin lakamunukpa', yu laqts'inkan ali yu jantu laqts'inkan, kaval xa'ukxtinin lakamunukpa', kaval angeles, kaval yu talhachimo'onun, kaval yu talhit'ajun tap'asta, va tu'uchun kavalcha. Tachun va yucha jalakmakal para ixnavin kaval.

<sup>17</sup> Yucha aqts'iyajcha ixlhi'alīncha y yu alati va astan. Va por yucha la ox ch'atay tachun yu alin. <sup>18</sup> Yucha junita sa'aqtsul ni kijnan tachun yu lhakapu'anau. Kijnan va tacha ixlakatunaj kajuu. Yucha pu'aqtaynil tachun yu alin y va yucha p'unaj kujchoqota la ixlhinin. Xlhiyucha por tachun, yucha apalay ay junita. <sup>19</sup> Tachun ixjatsukunti ni Dios val la ixjatsukunti ni Cristo, va chuncha lhipa'inil Dios. <sup>20</sup> Por yu makal ni Cristo, Dios naul ni tachun yu alin ox katataulal kun yucha. Nil ni Cristo y pumaj'al ixjak'alna laka kurus, xlhiyucha tachun yu alin lakamunukpa' ali lakt'iyān oxamaktaun taval kun Dios.

<sup>21</sup> Uxiknank'an maqancha vachu' la maqati ixt'aunat'ik y t'alaxkaynin ix'unt'at'ik kun Dios por yu ixp'ast'ak'at'ik ali yu ixmak'ayat'ik. Pero Dios makal para ox katalaqts'inchoqon ni uxiknan. <sup>22</sup> Chuncha val por yu makal Cristo la ixlakatunaj tejkan nil. Va para ixlapanakni Dios k'a'unt'ik para ox k'a'unt'ik la metsukuntik'an. Ex jantu lay matichun katamuk'anin laqtaqal tejkan yucha katalha'anan la ixtalaka'ukxpu' Dios. <sup>23</sup> Xlhiyucha maqsk'iniy kat'aylhip'int'ik la milhkapu'atk'an y laqp'aysnin k'a'unt'ik. Ex jantu k'amak'aunt'ijlat'ik yu ox p'akxan'iyat'ik yu tamasunin tejkan asmakt'ik ni ox chivinti. Ni anchānu chivinti laqpute'ekan talakachux

lakamunukpa'. Dios kixtaqnil ni kit'in ni aniy lhitapatsa yu ixlaqpute'eka.

*Ni Pablo laktapatsaniy yu talhakapu'an*

<sup>24</sup> Chavaycha klhi'achantajuy ni kla-maqanlqajnan la kilakatunaj por uxiknan. Ixlapanakni Cristo maqsk'iniy maqanlqajnanau. Chavay klaqayntsay lati yu maqanlqajnati. Ikmaqanlqajnan por ixlapanakni Cristo yu tacha ixlakatunaj tajunita. <sup>25</sup> Kit'in kval ix'oqxtamatk'an yu talhakapu'an. Va yucha ni lhitapatsa yu kimaqxtaqnil Dios por uxiknank'an para kaklaqpute'el tachun ixchivinti. <sup>26</sup> Ni aniy chivinti la maqancha ixmaqsaqta ni Dios pero chavaycha lakmamispanitacha ixlapanakni. <sup>27</sup> Ni Dios tamamispaniputun uxiknan yu jantu israelitas k'a'unt'ik ni anchanu chivinti yu vamun yu' ox, yu jantu ixmispakan. Ni anu chivinti najun ni Cristo va kun uxiknan. Xlhiyucha p'akxan'iniyat'ik ni oxixtu yu kataxtaqniyan. <sup>28</sup> Klhichivinanau y chuncha klakchivijvayau tachun ni lapanakni. Ox klakmasuniyau kun tachun jatapastak'ati para jantu tu'uchun kats'anqal la ixjatsukuntik'an kun Cristo Jesús. <sup>29</sup> Va yucha klhilaqltapatsay kun tachun ixtap'asta ni Cristo yu kixtaqniy.

## 2

<sup>1</sup> Va knajun kak'ats'at'ik ni la p'ays iktapatsay por uxiknank'an ali yu tavilanal laka putaulan Laodicea y por tachun ni lapanakni yu talhakapu'an yu jantuka' taks kintalaqts'in.

<sup>2</sup> Chuncha iktapatsay para kalaksast'inikal

ixjalhanutk'an y ch'antaun katalapaxkal para jantu tu'uchun kats'anqal la ixjatapastak'atk'an. Vachu ayaj iktapatsay para chuncha lay katamalaqasil ni anu chivinti yu kimPay Diosk'an ixmaqsaqta yu lhichiviniy Cristo. <sup>3</sup> La ixjatsukunti ni Cristo alin tachun yu apalay ixlaqmiti yu jatapastak'ati kun yu jatalaniti. <sup>4</sup> Chuncha klajunau para jantu matichun katamakanun mas va qal'oxicha kachivinil pero jantu laqsaval yu najun. <sup>5</sup> Mas jantu klat'ataulcha'au la kilakatunaj pero la kijatapastak'ati va tacha klat'ataulcha'au ch'antaun kun uxiknan. Va klhi'achantajuy ni ijk'atsay va ch'antaun unt'at'ik y la p'ays lhak'ap'up'inat'ik ni Cristo.

<sup>6</sup> Chuncha tacha tejkan la'a'it'ik ni Cristo Jesús miJalhachimo'onuk'an, chuncha kat'i'ukxunt'ayat'ik ch'antaun kun yucha. <sup>7</sup> Ch'antaun kun yucha k'a'unt'ik, ox kat'aylhip'int'ik kun yucha. K'at'ap'asnit'ik milhkapu'atk'an chuncha tacha tamasunitan. Chuncha apalay katalhaval milhkapu'atk'an y va si kaxt'aqnit'ikcha lhimalaqpuchuncha ni Dios.

*La ixjatsukunti ni Cristo alin tachun yu maqsk'inij*

<sup>8</sup> K'alhist'ajk'ant'ik para jantu matichun katalhimaanun por yu talaniy ixlaq'amank'an, por chivinti yu tacha laj'oxi kaval pero jantu laqsaval. Yucha vamun ixputsukk'an lapanakni ali xajatakpastak'ati aniy lakamunukpa'. Jantu ch'antaun kataval kun Cristo. <sup>9</sup> Tachun

yu Dios junita va la ixlakatunaj ni Cristo alin'ojota. <sup>10</sup> Va por Cristo lhit'aun'oyat'ik tachun yu maqsk'iniy. Yucha va xa'aqtsul tachun yu lhachimo'onun ali tachun yu talhit'ajun tap'asta lakt'iyen. <sup>11</sup> Uxiknan va tacha k'axvililich'uk'up'uxnik'ant'ik yu talaqalhin la metsukuntik'an. Jantu vali'iy lapanaki kaval yu taxvililichuk'up'uxnin. Va Cristo yu taxvililichuk'up'uxnin. <sup>12</sup> Tejkan aqch'aj'aut'ik va tacha kat'a'aknut'ik ch'antaun kun yucha. Lhak'ap'up'int'ik ni Dios yu majkujuchogol la ixlhinin. Xlhiyucha va tacha t'at'ak'ukch'o'ot'ik ch'antaun kun yucha. <sup>13</sup> Tejkan jantuka' ixak'anik'anat'ik mintalaqalhink'an, va ixt'i'ukxuyanant'ik laka lhinin. Ex ni Dios taxtaqnin sast'i jatsukunti y tamalaqmixinin mintalaqalhink'an. <sup>14</sup> Ix'alín yu ixlhaaniyau por jantu ixmakayau yu ixlhinaunkan, pero yucha malaqmixi'ol. Va tacha aqxtaun jalhiki ta'an ists'oqmulakanta kilhaanintik'an. Yucha maxtul y xtukmuk'al laka kurus. <sup>15</sup> Va lakmaxtuni'ol ixtap'astk'an ni xa'ukxtinin lakamunukpa' ali yu talhachimo'onun y jalakmalakat'unil. Laka kurus ni Cristo jalaqmaqalhajal, ex va tacha jalaqmaqalchoqonil tacha tach'inin.

<sup>16</sup> Xlhiyucha jantu matichun lay tamuk'aniyan laqtaqal por yu uyat'ik ali yu oqyat'ik. Vachu jantu lay tamuk'aniyan laqtaqal por yu talhinajun israelitas xak'atanax, por yu talhinajun tamin malkuyu', o por yu lay k'amak'at'i xajulchan jastaknati. <sup>17</sup> Yu anchanu ixlhinaunkan yu tasul p'unaj va tacha ixmaqts'ansilaqa ni Cristo yu ixminta, pero yu laqsaval maqsk'iniyat'ik vamun

ni Cristo. <sup>18</sup> Jantu k'amak'aunt'ik katamakanun y katamaxtunin milhilhajatk'an anchanu lapanakni. Yu'uncha va tacha lakst'uniy lakmakakan y vachu' tato'oyay angeles. Yu'uncha vamun talhichiviniy yu jantu laqsaval katalaqt'sil y laj'ay jalakmakakan ixlaq'amank'an. Tapastaknan tacha vali'iy lapanakni. <sup>19</sup> Yu'uncha jantu ch'antaun tat'ajun kun Cristo. Ni yucha xa'aqtsul yu lhakapu'anau, kijnan va ixlakatumaj. Yucha kintaxtaqniyan tap'asta y Dios makay para ka'aynlhi kilhakapu'atk'an. Va tacha taun lakatumaj ajin tejkan ixjasivikna malakatanuy tap'asta y ox laqxta'a ta'an talach'apata.

<sup>20</sup> Uxiknank'an va tacha k'anit'ik ch'antaun kun Cristo xlhiyucha jantucha talhichimo'oyan xa'ukxtinin aniy lakamunukpa'. ¿Vali'yicha t'aunat'ikcha tacha vananaj katalhichimo'on yu xa'ukxtinin aniy lakamunukpa'? <sup>21</sup> Yu'uncha tanajun: “Jantu kach'ap'a yu aniy, jantu k'a'ut'i yu anu', jantu klakch'ap'a yu avint'i.” <sup>22</sup> Tachun yu chuncha lhinaunkan va lhichiviniy yu niman tatantsiniy tejkan k'a'ut'i. Ni anchanu va yu talhinajun y tamalaninin yu vali'iy lapanakni. <sup>23</sup> Ni anchanu chivinti lhijunticha ox jatapastak'ati y lhijunticha laqsaval ox para kato'oyau Dios y para kamalakat'unikau y para laqatap'asta kalhistakvi kilakatumajk'an. Pero ni anchanu chivinti jantu kinta'aqtayjuyan para kamakajuu yu talaqalhin yu makaputunau.

### 3

<sup>1</sup> Uxiknank'an va t'a'ost'aulat'ikcha ch'antaun kun Cristo. Xlhiyucha k'alakxk'aut'ik yu alin

lakt'iyān ta'an vilchal ni Cristo la ixlhijakanaj Dios ta'an lay to'oyakan. <sup>2</sup> K'alhilakp'ast'aknant'ik yu alin lakt'iyān jantu yu xanavin aniy lakamunukpa'. <sup>3</sup> Uxiknank'an va tacha k'anit'ikcha y chavay maqsaq ma'anik'ant'at'ikcha metsukuntik'an kun Cristo la ixtalaka'ukxpu' Dios. <sup>4</sup> Ni Cristo va yucha yu taxtaqniyan jatsukunti. Tejkan katasuya' ni Cristo ex metsukuntik'an vachu katatasuya' kun tachun ix'oxixtu.

*Ni sast'i jatsukunti ali yu at'ali jatsukunti*

<sup>5</sup> K'amak'aumaqnit'ikcha tachun yu jantu laj'oxi la metsukuntik'an yu xanavin aniy lakamunukpa'. Jantu kat'at'amat'ik matichun yu jantu minavink'an. Jantu k'amak'at'ik yu jantu laj'oxi yu ayaj mak'ap'ut'unat'ik. Jantu k'alalhavap'ut'unt'ik mimaqalitk'an tus va tacha midiosk'an k'amak'at'ik. <sup>6</sup> Tachun yu aniy yu tamakay lapanakni, va por yucha lhitalqaman ni Dios. Xlhiyucha jamalaqachaniy maqanlqajnatī tachun yu jantu taqalasmata. <sup>7</sup> Vachu uxiknank'an chuncha ixmak'ayat'ik tejkan chuncha ixjunita mimpusukuk'an. <sup>8</sup> Pero chavay k'amak'aunt'ikcha tachun yu inchine': yu lhilukuj, yu talqaunti, yu jaxkayanti, yu jakiltayanti, y yu laqxtuqnu' chivinti yu taxtuy la minkilnak'an. <sup>9</sup> Jantu k'alamanunit'ik jalaklkanti, chavay maxt'unik'ant'at'ikcha yu at'ali' jatsukunti kun tachun yu p'unaj ixmak'ayat'ik. <sup>10</sup> Chavay lhilak'ayanant'ikcha kun yu sast'i jatsukunti. Lhilihiy tasast'iyat'ik para apalay chuncha k'a'unt'ik tacha Dios yu tamakan, tus ox k'amisp'at'ik. <sup>11</sup> Ta'an alin



yu aniy sast'i jatsukunti jantucha makayau kuenta incha qayntaun lapanaki va griego u israelita. Jantucha makayau kuenta incha va kaxvililich'uk'unik'ant'ik u incha jantu, u to'oxtaycha machaqa', u incha jantu k'alhits'uk'u jatalaniti, u incha va oqxtamati, u incha va x'aman tapatsay. Vamun makayau kuenta ni Cristo yu jamanavin tachun. Yucha alinta la ixjatsukuntik'an tachun ixlapanakni.

<sup>12</sup> Ni Dios talaksakni para ixlapanakni k'a'unt'ik y tapaxkayan. Xlhiyucha k'alamap'aynit'ik, ox k'alalhip'int'ik, k'amalak'at'unik'ant'ik, jantu k'alamak'anit'ik tu'uchun laqatap'asta, y k'ama'ant'aulat'ik. <sup>13</sup> K'alama'ant'aqnit'ik y k'alamalaqmixinit'ik incha tu'uchun lamak'aniyat'ik. Tacha Cristo tamalaqmixinin vachu va chun kalamalaqmixinit'ik. <sup>14</sup> Yu apalay maqsk'iniy va kalap'axk'at'ik. Chuncha va ch'antaun k'a'unt'ik la metsukuntik'an. <sup>15</sup> Ni Cristo oxamaktaun tamakan, ex chavaycha chuncha k'ap'ut'aulat'ik la mijatapastak'atk'an. Va xlhiyucha laksakk'ant'ik para ch'antaun k'a'unt'ik. K'alhip'axk'alaqts'inint'ik.

<sup>16</sup> Ni chivinti yu lhichiviniy ni Cristo va yucha ox katanul la mijatsukuntik'an. Yucha k'alamasunit'ik y k'alach'ivivat'ik kun ox jatapastak'ati. K'amilp'at'ik salmos ali milpati yu lhito'oyakan Dios ali milpati yu tamasulhaaniyan ni Espíritu Santo. Ex chuncha kun chux la melhanutk'an k'axt'aqnit'ik lhimalaqpuchuncha kiJalhachimo'onuk'an Jesucristo. <sup>17</sup> Tachun yu k'amak'at'ik o yu k'anaunt'ik, k'amak'at'ik la ixtaqa'uti ni kiJalhachimo'onuk'an Jesucristo. Va

por yucha k'alhixt'aqnit'ik lhimalaqpuchuncha ni Dios.

*Yu maqsk'iniy k'alamak'anit'ik*

<sup>18</sup> Uxiknank'an yu xanatin unt'at'ik, kat'o'oyat'ik mixapayk'an. Va chuncha tapaxtoqniy ixlapanakni ni Jalhachimo'onu' Jesucristo. <sup>19</sup> Uxiknank'an yu jo'akna unt'at'ik k'ap'axk'at'ik mixanatik'an. Jantu aqtaun kalhimaqch'ap'ut'ik.

<sup>20</sup> Uxiknank'an yu s'at'an unt'at'ik k'a'al'asmakt'ik mimpayk'an kun minat'k'an, va chuncha lhipa'iniy ni Jalhachimo'onu' Jesucristo. <sup>21</sup> Uxiknan yu japayan unt'at'ik jantu kalakmaluk'ujlat'ik mes'at'ank'an para jantu kataxkanil ixjalhanut'k'an.

<sup>22</sup> Uxiknank'an yu oqxtamatin unt'at'ik k'a'alasmakt'ik mi'ukxtinink'an yu aniy lakamunukpa'. K'alakt'ap'ats'anit'ik jantu vamun tejkan katatsukun laqts'inin y jantu vamun por ox kalaqts'inp'ut'unk'ant'ik. Va kalakt'ap'ats'anit'ik kun tachun mi'achat'k'an, va tacha k'at'o'oyat'ik Dios. <sup>23</sup> Mas va tisuncha yu k'amak'at'ik, k'at'ap'ats'at'ik kun tachun mi'achat'k'an tacha kats'uk'ut'ik lhilaqltapatsanin kiJalhachimo'onuk'an y jantu yu vali'iy lapanaki. <sup>24</sup> K'ats'ayat'ikcha ni kiJalhachimo'onuk'an Jesucristo kataxtaqniyan milhilhajatk'an yu tapaxtoqniyan. Va kiJalhachimo'onuk'an yu t'ap'ats'aniyat'ik. <sup>25</sup> Yu tamaka'alhiy yu jantu laj'oxi, katalaqa'iya' yu jantu laj'oxi por yu tamakal. Dios va mustaun jamakay tachun lapanakni.

## 4

<sup>1</sup> Uxiknank'an yu ukxtinin unt'at'ik va ox k'amak'at'ik chuncha tacha yu laqsaval tapaxtoqniy mi'oqxtamatk'an. K'ats'ayat'ik ni vachu' alin mi'ukxtink'an lakt'iyen.

<sup>2</sup> Ox k'at'aylhip'int'ik t'achivinin Dios kun tachun mijatapastak'atk'an y k'axt'aqnit'ik lhimalaqpuchuncha. <sup>3</sup> Vachu' kask'int'ik Dios por kijnank'an para chuncha kiJalhachimo'onuk'an kintamalaq'lti'anin kilakatink'an. Ex lay kaklaqpute'eu ni chivinti yu ixmaqsagma'akanta yu lhichiviniy Cristo. Va xlhiyucha iktanun laka pach'in. <sup>4</sup> Vachu k'ask'int'ik para ox kakhichivinil yu klaqpute'ey, tacha kimpaxtoqniy kakchivinil.

<sup>5</sup> Ox k'at'i'ukxunt'ayat'ik kun yu jantu talhakapu'an. Ox k'alakp'ast'aknant'ik para jantu vali'iy kats'anqal mijulchank'an. <sup>6</sup> K'alakt'ach'ivinint'ik kun chivinti yu ox kalhixajchalcha, yu katalhipa'inil. Ex chuncha k'amisp'ayapitik tacha maqsk'iniiy k'alhi'alt'aych'o'ot'ik qayntamin.

### *Ni Pablo jamalaqachaniy jamastak'anti*

<sup>7</sup> Tachun yu iktapasay kit'in ancha katamak'atsaniyan ni Tikiko yu k'achaniy tacha kilaqaj y yu ki'aqtayjunu'. Yucha ox taylha'an y ch'antaun iktapatsaniyau ni kiJalhachimo'onuk'an. <sup>8</sup> Va yucha klamalaqachaniyau para k'ak'ats'at'ik tacha k'alintaucha para katama'ayajnin melhanutk'an. <sup>9</sup> Vachu kat'a'antachal ni Onésimo yu kint'alaqajunk'an yu ox taylhaaniy y yu k'achaniyau. Yucha va mint'amachaqak'an

junita. Yu'uncha katamak'atsaniyan tachun yu iktapasayau aniy.

<sup>10</sup> Tamastak'ayan ni Aristarco yu kint'atach'in y vachu' Marcos ixpuxniunti Bernabé. Uxiknank'an unk'ant'at'ikcha tacha maqsk'iniy k'amak'anit'ik. Incha ancha katalaqcha'an ox kala'a'it'ik. <sup>11</sup> Vachu tamastak'ayan Jesús yu vachu' junkan Justo. Mas va lhuucha alin yu israelitas pero vamun yu'uncha kintat'atapatsay para kalaqpute'ekal tacha lhachimo'onun ni Dios. Yu'uncha ox kintamalaka'ulata.

<sup>12</sup> Vachu aniy tamastak'ayan Epafras yu ix'oqxtamati Cristo y mint'amachaqak'an junita. Yucha va tacha sk'incha Dios kun tachun ixtap'asta para apalay ka'ayn'al milhakapu'atk'an y para k'amaqxt'aqk'ant'ik tachun yu najun Dios. <sup>13</sup> Kit'in klajunau ni ijk'atsay ni Epafras va pastak'uy por uxiknank'an y por tachun yu talhakapu'an laka putaulan Laodicea ali laka putaulan Hierapolis. <sup>14</sup> Vachu' aniy tamastak'ayan Lucas yu doctor junita yu achaniyau y vachu' Demas.

<sup>15</sup> Uxiknank'an vachu k'amast'ak'at'ik yu talhakapu'an Jesucristo laka putaulan Laodicea. Vachu k'amast'ak'at'ik Nimfas y tachun yu talhakapu'an yu tataqxt'o'a la ixchaqa'. <sup>16</sup> Tejkan k'ap'ut'e'e'oyapitik ni aniy karta k'alakmap'asanit'ik yu talhakapu'an laka putaulan Laodicea para chuncha vachu' katapute'el. Vachu k'ap'ut'e'et'ik ni karta yu ancha talhit'aunachal. <sup>17</sup> Ka'unapitik ni Arkipo para ox kamaka'ol ni lhitapatsa yu xtaqnil ni Jalhachimo'onu' Jesucristo.

18 Kit'in kPablo klamastak'a'oyau. Aniy klats'oqniyau kintaqa'uti kun la kimaka'. Kap'ast'akt'ik ni kit'in va ktach'in kunita. Katamayaynin ni Dios. Chuncha kavalcha.

**Ixchivinti Dios: ni sast'i chivinti yu Dios  
jat'atamakaul ixlapanakni laka lhimasipijni  
New Testament in Tepehua, Tlachichilco  
(MX:tpt:Tepehua, Tlachichilco)**

copyright © 2004 Wycliffe Bible Translators, Inc.

Language: Tepehua, Tlachichilco

Translation by: Wycliffe Bible Translators, Inc.

Tepehua, Tlachichilco [tpt], Mexico

**Copyright Information**

© 2004, Bible League International

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Tepehua, Tlachichilco

**© 2004, Bible League International**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

9bc3139d-0023-5d1b-901b-a143c1b0431c